

تسقط الحائث الرجعية !

باش تتحل محاكمة جديدة في تونس: قرابة الاربعين شاب باش يتعداو على محكمة امن الدولة
نهار ١٦ سبتمبر ١٩٧٢ ، متوجهة ضد هم تهمة مؤامرة على امن الدولة والتحرير على الشعب وتشويش
الامن العام وتكوين منظمة غير قانونية وشتم اخرى غيرها .

المحاكمة هاذي جات بعد الحوادث الكبيرة اللى عاشتها بلادنا العام هذا وبالخصوص مظاهرات
الطلبة والشعب متاع فيفري واضرابات العمال في العاصمة وسفاقير وقفصة وغيرهم .

قدام ها النضالات الحكومة ما جاوت كان بالقمع والاضطهاد : سبت كلابها البوليسية و"البوب"
والحرس والجيش على الشعب ، ضربت الطلبة والتلامذة وسكرتلهم كلياتهم ومدارسهم ، سركلت
الخدمة وضربتهم وطردتهم ، وقتت الشبان المناضلين وعذبتهم ورماتهم في الحبوسات ، اعتقلت
العمال وعداتهم على المحكمة وسجنتهم ، وصلت باش تضرب المتظاهرين بالرصاص وتقتل اولاد
الشعب .

كذلك الحكومة قدام الكفاح الشعبي استعملت الدفخة والكذب والدعاية الخبيثة باش توسخ
نضال الجماهير وتشويهه وتضعفه : ادعات اللى هو تهديم وهمجية وتكسير ، وقالت اللى هو
خدمة " كمشة مخربين " " اعتداء لامة والشعب " ، وقالت اللى هو من تحت يد الخارج وقالت
اللى هو مؤامرة صهيونية منظمها اسرائيل .

لكن لا فادها قدام نضال الشعب لا القمع ولا الكذب وما نجمت توقف الكفاح ، ورغم كل القمع
تواصلت الاضرابات وتجبرت الحكومة باش توخر قدام الجماهير . تضرب وتقمع ولكن ديمة توخر
والنضال يتقدم .

واليوم ما هياش راجعة في القمع والكذب ، شدت مناضلين وباش تعديهم على المحكمة زعمة
زعمة هو ما اللى شعلوا المظاهرات والاضرابات . لكن ياخي تسات والا تحب تنسى اللى المظاهرات
هى اللى تشعل فيها بيد ها ، تشعل فيها بالاستقلال اللى مسلطتو على الشعب والاضطهاد اللى
مهبطتو عليه . ها النظام الدستوري اللى ما را مشو الشعب كان البطالة والفقر ، والاستغلال والظلم
والتطريد من القرية والخدمة ، والفربة والتشريد ، النظام هذا هو بيد واللى لز الجماهير
لنضال والمقاومة واللى دفعهم للمظاهرات والاضرابات .

آشكون هو المتآمر على امن الشعب ؟ ما هو الا نظام بورقوية اللى يستغل في الخدمة ويفقر في
الفلاحة ويشرد في المواطنين . آشكون هو اللى يشوش في راحة الشعب ويحرض على الشعب ؟ ما هو
الا نظام الدستور اللى ضرب الطلبة وحاكم العمال ورمى الجماهير بالرصاص . آشكون هو اللى
يتآمر مع الاجانب و بايع بلادنا جملة للاماريكان والفرانسييس ؟ ما هى الا حكومة نويرة وجماعتو اللى
حاليين تونس للاستعماريين ينهبو فيها كيمو حبو واشتهاو . واشكون هو عميل الصهيونية واسرائيل ؟
ما هو الا بورقوية اللى يسجن في المناضلين المتضامنين مع فلسطينيين ويصمت في برقيات التهاني لصاحبو
الملك حسيمن جزار الشعب الفلسطيني .

بورقية يحب يفضلي هذا الكل ويوسخ المناضلين ويرد هم مشوشين و متأمرين و متعاملين مع الخارج . لكن اشكونهم في الحقيقة ثما المناضلين ؟

ارمين شاب ، طلبة و مثقفين ، غالبهم شد هم البوليس تو اكثر من ستة شهر يعنى بعد حواد فيفري وعذبهم وتنكل بيهم و رما هم في الحبس ، من جملتهم الرفيق احمد بن عثمان اللي تو عندو عام ونصف و هو في التوقيف وكذلك الرفيقة دليلة بن عثمان اللي هي مناضلة ثورية عذبها البوليس و رماها في الحبس تو اكثر من نصف عام وثمة كذلك بعض المناضلين اللي كانوا تحاكمو وترطو عام ١٩٦٨ و ١٩٦٩ كيف الهاشمي الطرودي وعبدالله الرئيسي وعبد الله الداى الشابي ومحمد صالح فليس وثمة عدد كبير من الطلبة اللي شاركو في حركة فيفري وكذلك مناضلين من صفاقس وقصصة والقصرين . ها الشبان هاذم آمنو بقضية الشعب ويحبو يخدمو لمصلحتو ويرطو ارواحهم بالكفاح متاعو ، ويعاونوه على تنظيم نفسو باش يتغلب على الاعداء متاعو .

بالمحاكمة هذى النظام يحب يعزلهم على الشعب ويعزل الشعب عليهم ، كذلك يظن اللي بالمحاكم ينجم يلقى النضال الشعبى و يخوف المناضلين . هذى هي حساباتو ، لكن اللي يحسب وحد و يفضلو .

كيما محاكمة ١٩٦٨ مافاتو حتى شى و رجعت عليه و فضحتو و كيما مافاتو شى محاكمة الرفيقة سيمون بن عثمان و كيما فشلت محاكمة عمال " السوريتراس " وكشفتو قدام الطبقة الشغيلة ، كذلك المحاكمة هذى مالها كان تزيد تفضحو و تكشف مناوراتو و تورى للناس الكل اللي هو عافس على الحريات و خائق الشعب .

هذاكه علاش يلزمنا نجعلو من هـ المحاكمة فرصة اخرى نقرير فيها نضالنا من اجل الحرية و الديمقراطية و تقاومو النظام و دكترتو و ندعمو الكفاح الشعبى في تونس .

كفاح كل الديمقراطيين و كل انصار الحرية و المناضلين الثوريين و العمال و الشبيبة و كل الطبقات الشعبية ضد هـ المحاكمات الزايفة هوالى ينجم يفشلها ويسد قدامها البيان ويرجعها محاكمة ضد النظام موش ضد المناضلين .

تسقط المحاكمات الرجعية المزيفة
عاش كفاح الجماهير الشعبية
اطلقو سراح المعتقلين السياسيين
الحرية للشعب

باريس في ١ سبتمبر ١٩٧٢
(المامل التونسي)